


土岐文庫  
文庫17  
W157  
2



11-2



文庫 17  
W157  
2



後村詩話續集卷一

宋劉克莊

朱氏感興詩第七章以唐經亂周史咎歐陽子卒章曰侃侃  
范太史受說伊川翁春秋二三策萬古開羣蒙此一大議論  
通鑑綱目所為作也學者相承皆謂其說本於程氏而范氏  
朱氏發之其實未然按唐史沈既濟傳云既濟吳人以宰相  
楊炎薦為史館修撰初吳兢撰國史為則天本紀次高宗下  
既濟奏議以為則天進以強有退非德讓史臣追書當稱為  
太后不宜曰上中宗雖降居藩邸本吾君也宜稱皇帝不宜  
曰廬陵王睿宗在景龍閒假臨大寶於誼無名宜曰相王未  
可曰帝且則天改唐為周立七廟今以周廁唐列於帝紀考  
之禮經是謂亂名中宗嗣位在太后前而序年製紀反居其

後村詩話續集卷一

通鑑叢書



010185185678

下方之躋僖公是謂不智昔漢高后獨有王諸呂爲負漢約  
無遷鼎革命事時孝惠已歿子非劉氏不繼呂后尚誰與哉  
議者猶謂不可魯昭公之出春秋歲書其居曰公在乾侯君  
在雖失位不敢廢也請省天后紀合中宗紀每歲首必書中  
宗所在以統之曰帝在房陵太后行其事改某制紀中宗而  
事迹太后之名不失正禮不違常矣又云太后遺制自去帝  
號及中宗上冊后之名不易今祔陵配廟皆以后禮宜入皇  
后傳題曰則天順聖武皇后議不行而止蓋吳兢承遷固呂  
紀之誤歐公承兢武紀之誤中閒有一沈既濟健論卓識照  
映千古蓋乞削去武紀者既濟也引公在乾侯例書帝在房  
陵者亦既濟也其閒此議在伊洛諸賢之先諸老先生非掩



人之善者偶未之見耳

已未二月十九夜偶讀沈傳時年七十二

許由事不見於經故揚雄以爲疑誠齋云子雲到老不曉事  
不信人閒有許由雖沈著痛快終未有以折衷鄱陽前輩湯  
君錫獨曰堯始讓四岳四岳舉舜乃讓於舜左傳云夫許太  
岳之後杜注云堯四岳然則太岳非由乎後人遂有洗耳之  
說爾援引切而說不鑿可謂之善讀書矣君錫名師中苦學  
強記既科第遽棄官亦不求岳廟以終其身與趙昌甫友善  
南谿柴公序其文人物高勝升伯仲能季庸之兄伯紀之父  
也

瞻彼中林侯薪侯蒸古注云朝宜有君子而但聚小人韓嬰  
引晏子謂齊景公左右爲社鼠用事者爲惡狗出則賣君效

利入則託君不罪亂法君又并覆而有之此社鼠之患也人有市酒甚美之者至酸而不售問里人里人曰公之狗甚猛人持器欲往狗輒迎而嚙之所以不售也士欲白萬乘之尊用事者迎而嚙之此國之惡狗也此事與經文若不相涉而深有發明他多類此

魯監門之女嬰相從績中夜而涕泣其偶曰何泣也嬰曰吾聞衛世子不肖所以泣也其偶曰衛世子不肖諸侯之憂也子曷為泣也嬰曰昔宋桓司馬得罪於宋君出於魯其馬佚而鬻吾園而食吾園之葵是歲園人亡利之半句踐攻吳諸侯畏其威魯往獻女吾姊與焉兄往視之道畏而死越兵威者吳也兄死者我也今衛世子甚不肖好兵吾能無憂乎韓

引此事解大夫跋涉我心則憂極有意味

與列女傳織室女事大同小異

南有喬木不可休思漢有游女不可求思韓傳此章云孔子南游適楚至於阿谷之隧有處子佩瑱而浣者孔子抽觴以授子貢曰善為之辭以觀其語子貢曰逢天之暑願乞一飲以表我心婦人對曰欲飲則飲何問婦人授觴挹之置之沙上曰禮不親授子貢以告孔子抽琴去其軫授子貢曰善為之辭子貢曰於此有琴而無軫願借子以調其音婦人對曰吾野鄙之人也五音不知安能調琴子貢以告孔子抽絺綌五兩以授子貢曰善為之辭子貢曰於此有絺綌五兩吾不敢以當子身敢置之水浦婦人對曰客分資財棄之野鄙吾年甚少何敢受子子不早去有狂夫守之者矣信如此言是

此女能以禮自防而聖賢乃再三設辭以挑試之此前世陋  
儒之說而韓氏取之謬矣

晉文公亡里鳧須從盜文公資而亡重耳餒不能行子推割  
股肉以食然後能行及反國國中多不附里鳧須造見曰臣  
能安晉國文公曰子尚何面目來見寡人也里鳧須曰臣襲  
竭君之資而君以餒罪至十族然君試赦之罪與驂乘游於  
國中百姓見君不念舊惡人自安矣文公從其計百姓皆曰  
里鳧須且不誅而驂乘吾何懼也事在雍齒之前

楚熊渠子夜行見寢石以爲伏虎彎弓射之沒金飲羽事在  
李廣之前

卜商從衛君而見趙簡子簡子被髮杖矛而見我君我趨而

進曰諸侯相見不宜不朝服不朝服行人卜商將以頸血濺  
君之服矣簡子反朝服而見事在藺相如之前

齊莊公出獵有螳螂舉足將搏輪莊公回車避之而勇士歸  
之事在句踐揖怒蛙之前

孔子燕居子貢攝齊而前曰才竭而短不能後進請一休焉

子曰若之何其休也子貢曰君子亦有休乎子曰闔棺乃止  
語曰死而後已

君子避三端避文士之筆端勇士之鋒端辯士之舌端以上見韓

東海有勇婦何慙蘇子卿學劍越處子超騰若流星捐軀報  
夫讎萬死不顧生白刃曜素雪蒼天感精誠斬首掉國門蹴

躡五臟行豁此伉儷憤燦然大義明北海李使君飛章奏天庭舍罪警風俗流芳播滄瀛志在列女籍竹帛何光榮按唐列女傳逸此女子事亦無姓名賴太白詩以傳李使君必邕也

世謂謫仙眼空四海然贈孟浩然云吾愛孟夫子上李邕云宣文猶能畏後生丈夫未可輕年少則盡尊宿之敬與侍郎叔游洞庭云三杯容小阮醉後發清狂獻當塗宰從叔陽冰云吾家有季父傑出聖代英則執子姪之恭集中與羣從兄弟從甥姪多所稱獎與郡縣小吏如何判官云夫子今管樂未知判官何如人而當此句崔司戶昆季云千金散義士四座無凡賓欲折月中桂持爲寒者薪必疏財好客者如崔秋

浦鄭深陽皆比之陶令談少府劉少府皆比之梅生其於人情世法亦甚委曲未嘗以金閨之彥青雲之士自居杜公氣象亦如此

上哥舒大夫述德陳情一篇其詞甚衰是先與哥舒有還往矣及流夜郎贈江夏韋守敘亂離事則云函關壯帝居國命懸哥舒長戟三十萬開門納凶渠直書其罪曾不少恕與杜老同

繫潯陽獄上崔相三詩末篇云縱爲夢裏相隨去不是襄王傾國人此言迫脅而行非其腹心上客而或者注云此一首恐非上崔相者誤矣送王屋山人魏萬五言云十三弄文史魏亦有酬李翰林一篇見李集云宣父敬項橐林宗重黃生

則魏之年甚少亦可見謫仙忘年折節處魏詩高自稱道與任華同二人敢與李杜倡酬其膽亦不可及矣

東武吟云白日在高天回光燭微躬清切紫霄迴優游丹禁通君王賜顏色聲價凌煙虹一朝去金馬飄落成飛蓬贈宋陟云早懷經濟冊特受龍顏顧白玉棲青蠅君臣忽行路二詩與杜公集賢學士如堵牆觀我落筆中書堂往時文采動人主此日飢寒趨路旁之作悲壯略同

古樂府使君謝羅敷寧可共載無羅敷前致詞使君一何愚使君自有婦羅敷自有夫東方千餘騎夫婿居上頭三十侍郎中四十專城居是羅敷之夫亦五馬矣其載之間何使君之佻易也豈亦寓言如金吾子之類耶

謝惠連擣衣篇云腰帶準疇昔不知今是非張籍殷勤初看初著時征夫身上宜不宜張文潛別來不見身長短若比小郎衣更長之句皆本此

玉臺新詠如是妾愁成瘦非君重細腰如弦斷猶可續心去最難留如城中皆半額非妾畫眉長如怨黛舒還斂曉妝拭更垂有唐人精思所不能及者

尹和靖詩僅二三首其自秦入蜀道中云綠陰深處竹籬遮也有紅花映白花卻憶故鄉卿相第不及張三李四家和靖洛人洛陽名園甲天下一旦蕩爲劫灰故其詩如此又一絕云南枝北枝春事休嗚鶯乳燕也含愁朝來回首頻惆悵身過秦川最盡頭



自种放常秩後惟尹和靖得位最速然一生轉徙患難全家死虜禍僅以身脫南渡再召已六十七歲不兩年至從橐其峻擢以力拒僞齊亡命入蜀不專為程氏高弟之故

秦少游嘗謫處州後人摘柳邊沙外詞中語為鶯花亭題詠甚多惟芮處士一絕云人言多技亦多窮隨意文章要底工淮海秦郎天下士一生懷抱百憂中

張天覺晚尤重釋老為華嚴閣醮籙會緇黃皆歸之了翁以詩代書曰辟穀非真道談空失自然何如勲業地無媿即神仙天覺雖貴為宰相平生有媿多矣若果如釋老之說竊意其昇天成佛必在了翁之後或言了翁詩末句不該佛然佛亦謂之金仙

后山云稽首西方仙

鶴相海外書稱其子詞翰陶商翁有別丁琪詩云風霜慈母衣中線塵土先人壁後書琪乃鶴相之子必好學者

陶商翁五言如梟鳴社旁樹盜發冢中金煉成丹竈在騎去鶴巢空鹿飲沙渾水蟻飢果落雲七言如將老未聞金作印師寒猶用鐵為衣山險不能留霸業水聲唯解送年華道近可憐駑馬駿時平不見布衣雄之類皆可傳

朱新仲題元英舊隱云五季浪拍天不覆漢翁船語意甚新不犯前人

屏山子魚詩云虐戲等剝孕淫刑真戮孥茶山食蜂兒云奪食已非義焚巢真不仁殺身緣底罪作俑定何人二詩可戒暴殄天物者

鄭左司子敬家有玉臺後集天寶閒李康成所選自陳後主  
隋煬帝江總庾信沈宋王楊盧駱而下二百九人詩六百七  
十首彙為十卷與前集等皆徐陵所遺落者往往其時諸人  
之集尚存今不能悉錄姑摘其可存者於後

詠王昭君 忽見天山雪還疑上苑春張文漢月正南遠燕

山直北寒董思厭踐冰霜域嗟為邊塞人思從漢南獵一見

漢家塵又云自嫁單于國長街漢掖悲容顏日憔悴有甚畫

圖時鄭元振三首內一首已入詩選香山云愁苦一雙淚滴

黃河水應得東流入漢家王

舟行有返棹水去無還流沈佺期莫莫望歸客依依江上船

潮落猶有信去楫未知旋張繼望送別到中流秋船倚渡頭

相看尚不遠未可即回舟祖詠長階落花滿空院野鶯啼煬

不歸拂簾承花落開簾待燕歸陳子良學玉漱花紅發金塘

水碧流相逢畏相失並著采蓮舟崔國輔常聞浣紗女復有

弄珠姬張祐映花誰辨色隔樹不分香晁祖道五侯新拜寵

七貴早朝歸江總長書因計吏船徐街蘆處處落無有繫書

鴻祇言花是雪不悟有春來蘇子卿落梅勝於傳語春光道

先歸何處邊煬帝成童片子時愛老須臾事劉

詠古 君王無處記臺榭若平生王勃銅妾妬今應改君恩

昔不平張修長門怨

閨情雖是從來月東窗異昔時今宵一長夜應斂幾人眉庾

望月團扇辭恩寵回文贈苦辛李金鉤全出樹桑條半隱籬

欲教見纖手攀取最高枝周宏正采桑

那作商人婦愁水復愁風張晁江風行扇掩將雛曲釵承墜馬鬢

張昌宗大平公主山亭宴古調琴先覺愁容鏡獨知王適古離別退之一所謂奇男子者

夜千年猶不足徐陵自憐年正少復倚墻為郎崔顥王髮薄不

勝花謝偃還恐裁縫罷無信達交河虞世南小膽空房怯長眉滿

鏡愁為傳兒女意不用遠封侯常理古離別殺荷不斷藕憐心已

復生梁陳雜歌在家嬌小女卷幔愛花叢不畏羅衣溼折花風雨

中張子容欲作勝花妝從郎索紅粉 欲呈纖纖手從郎索指

環丁六孃十索詩

天寶閒大詩人如李杜高適岑參輩迭出康成同時乃不為

世所稱若非子敬家偶存此編則許多佳句失傳矣中間自

載其詩八首如自君之出矣絃歌絕無聲思君如百草撩亂

逐春生似六朝人語如河陽店家女長篇一首叶五十二韻

若欲與木蘭及孔雀東南飛之作方駕者末云因緣苟會合

萬里猶同鄉運命儻不諧隔壁無津梁亦佳但木蘭始代父

征戍終潔身來歸仲卿妻死不事二夫二篇庶幾發於情性

正乎禮義店家女則異是王姬兒雖蓬頭歷齒母許墻之矣

女慕鄭家耶裘馬之盛背母而奔之康成卒章都無譏貶反

云傳語王家子何為不自量豈詩人之義哉

汲冢書十卷七十篇與藝文志周書七十一篇合但少一篇

晁子止謂其記錄失實李仁父謂書多駁詞宜孔子所不取

又謂劉向司馬遷班固皆嘗見此書其後稍隱及盜發冢乃

幸復出中間所載武王征四方馘億有十萬七千七百七十  
有九俘三億萬二百三十暴于秦皇漢武矣有禽虎二十有  
二麋二千五百三十五犀十有一麇七百二十有一熊百五  
十有一羆百一十有八象三百五十有二貉十有八麀十有  
六麕五十鹿三千五百有八紂囿雖大安得熊羆如是之眾  
又謂俘商寶玉億有百萬皆荒唐誇誕不近人情非止于駁  
而已百篇聖筆所定孟子猶疑漂杵之語前輩云吾欲忘言  
觀道妙六經俱是不全書況汲冢書之類乎

商辛燔二女縊世謂太公蒙面以斬妲己非也柳子厚非國  
語笑其誣且耄汲冢書云叔向使周見太子晉歸告平公曰  
太子晉行年十五而臣弗能與言請歸周之二邑若不反及

有天下將以為誅平公將歸之師曠不可曰請使瞑臣往與  
之言往見太子問答往覆師曠不能難稱善曰王子汝將為  
天下宗乎王子曰吾聞汝人之年長短告也師曠對曰汝聲  
清汗汝色赤白火色不壽王子曰吾後三年上賓于帝所師  
曠歸未及三年告死者至子晉靈異容有此理但曠瞽而聰  
聲清聽而知之火色瞽豈能辯豈非誣而耄歟

高文虎作西湖放生池記以鳥獸魚鼈咸若為商王事太學  
諸生為諛詞哂其誤陳晦行史集賢制用昆命元龜字闔帥  
倪侍郎駁論之陳累疏援引唐人及本朝命相制皆用此語  
史擢陳臺端劾倪削秩罷去或為一聯云舍人舊錯夏商鼈  
御史新爭舜禹龜聞者絕倒

石敏若絕句云來時萬縷弄輕黃去日飛毬滿路旁我比楊花更飄蕩楊花只是一春忙

袁紹檄孟德云贅闡遺醜徐敬業檄武氏云一坏之土未乾六尺之孤何託侯景檄湘東云項羽重瞳尚有烏江之敗湘東一目豈爲赤縣所歸皆罵得毒矣然操能全陳琳武后不怒駱賓王反謂宰相安得失此人惟湘東竟殺王偉偉教景覆臺城戮武帝弑簡文辱妃主萬死宜也湘東始悅其五百言佞詩而欲活之及見一目之檄偉遂不免忘九廟之讎恥快一身之喜怒安得令終乎

石曼卿詩惟籌筆驛詞翰俱妙人所傳誦及樂意相關禽對語生香不斷樹交花一聯爲伊洛中人所稱他作苦不甚見

晚得其集石徂徠作序稱其與穆參軍以古文自任而曼卿尤豪於詩石自序性懶有作不能錄早時解記數百篇過壯記益衰近幾盡廢有收百篇來者覽之或能尚識或如非已言久乃能辯遂併近詩存三百篇藏之於家歐公尤重其人范公有鑿幽索祕破堅發奇高凌虹霓清出金石之評集中華山泰山嵩山五言長篇各一首筆力在辭能之上餘警句尚多五言云行人晚更急歸鳥夕無行登樓天寒河影澹山凍瀑聲微山寺水盡天不盡人在天盡頭高樓草白有時榮髮白不再好人生不如春髮白不如草贈別弋下失溟鴻網細遺巨鷗送李庭之風勁香逾遠天寒色更鮮秋天買不斷無意學金錢叢菊七言云洛渚微波長映步漢宮香水不濡肌荷花

獨步世無吳苑豔渾身天與漢宮香牡丹恥生湯武干戈域

寧死唐虞揖遜區首陽自注山在蒲舜都也汾河不斷天南流天色無情

澹如水寄尹師魯南朝文物盡情賢不事風流即放言三百年閒

卻堪笑絕無人可定中原南朝中散何人疏懶甚步兵因酒過

差多自喻皆清拔有氣骨

曼卿紅梅詩云認桃無綠葉辨杏有青枝坡公以為村學堂

中語然卒章云未應嬌意急發赤怒春遲不害為佳作也

沈相落職制云君人臨照百官蓋欲其清白以承休德宰輔

儀型四海豈宜以寵利而居成功繁余既老之臣自喪不貪

之寶其還顯秩用厭師虞具官某頃以藩條擢聞機政惟人

求舊惟文武可以憲邦秉國之鈞何風采不如治郡朕猶虛

已日佇嘉猷情神強而折衝未聞宏略血氣衰而戒得以減

廉聲既已乖鼎鼐之調始欲挂衣冠而卻雖曲全於禮貌乃

游致於抨彈其鑄祕殿之華俾即安車之佚噫君子慎始防

嫌疑於未然貴臣抵辜尚遷就而為諱慨往愆之莫救期晚

節以自全陳樞密降官制末云為祈父之爪牙初期陳力視

秦人之肥瘠良負虛懷時于湖年未三十而筆力高簡如此

沈坐簞簋陳坐辭難而責兩制尾聯皆妙益公行樞密責詞

亦精切然稍費詞矣

于湖詩苦不逮總得然上丁齋宿云北來被髮車連野東走

乘桴浪接天汲汲兩宮常旰食受膳歸去淚如川與胡邦衡

云夢了瓊崖身益壯煙銷金鴨臭空傳之作極佳

世宗欲相陶穀范質不可而止穀以爲怨及建隆相質穀當制云十年居調燮之司一旦得變通之術以報前忿范讀之泣下余謂穀徒知機玩范文素不知禪文出於袖中乃變通之尤甚者况陳橋之變文素固嘗以大義責新朝然熙陵尚惜其欠世宗一死而穀預爲揖遜之詔與樊系作冊文何異藝祖太宗皆不大用聖矣哉

信州道旁有泉一泓甚清溉田極廣舊有詩牌云炎炎亭午暑如焚恰恨都無一點雲六月騎驢來到此幾乎渴殺老參軍潘逍遙詩也而集乃不收徐斯遠傳載其牡丹一絕而逸此詩徐家於信豈未之見耶

淵明有述酒詩自注云儀狄造杜康潤色之而終篇無一字

及酒山谷謂述酒一篇蓋闕此篇多不可解韓子蒼因山陽下國一語疑是義熙以後有感而作至湯伯紀始反復詳考以爲零陵哀詩又謂淵明歸田本避易代之事而未詳明言之至此主弑國亡其痛疾深矣雖不敢言而亦不可不言故若是夫詞之庾也湯箋出然後一篇之義明其閒如峽中納遺董朱公練九齒之句又詠貧士云阮公見錢入卽日棄其官又云昔在黃子廉二事未詳出處子廉之名僅見三國志黃蓋傳清貧事無所考伯紀闕疑以質於余余亦不能解徐斯遠絕句云紙衣竹几一蒲團閉戶然其自屈盤誦徹離騷二千五不知月落夜深寒水心稱遠有凍餓自守之樂非過也

姜堯章有平聲滿江紅自敘云舊詞用仄韻多不叶律如末句無心撲歌者將心字融入去聲方諧音律余欲以平韻爲之久不能成因泛巢湖祝曰得一席風當以平韻滿江紅爲神姥壽言訖風與帆俱駛頃刻而成末句云聞佩環則協律矣其詞云仙姥來時正一望千頃翠瀾旌旗與亂雲俱下依約前山命駕羣龍金作輶相從諸娣玉爲冠廟中列坐如夫人者十五人向夜深風定悄無人聞佩環神奇處君試看奠淮右阻江南遣六丁雷電別守東關應笑英雄無好手一篙春水走曹瞞又怎知人在小紅樓簾影閒此闕佳甚惜無能歌之者羅鄂州文雖少而善集中鸚鵡洲賦二篇其首篇云登黃鶴之高樓兮欣徙倚而四顧何南望而獨愁兮有正平之遺處

指垂堂而示戒兮何足以知君子之度方黨禁之既解兮凜清議其尚存無罪而戮一介兮眾必爭起而譟讟士猶恃此而不恐兮時亦直情而徑行寧知嗾夫妄庸兮使之魚肉而甘心稽建安之事勢兮魏甚苑而漢枯每不忍其贅旒兮思忠憤之稍攄惟不擇其所發兮遂至於顛沛而闕疏當其解衣而慢侮兮坐皆驚悸而失箸吾謂死於漁陽之慘摠兮何與乎鸚鵡之一賦使英雄初無殺心兮雖頗困苦而終赦惟此客以授我兮宜相與尸祝之不暇兵在頸而追救兮奈何以此欺天下萬一僥倖而脫身兮終亦無以自全北海仗正而孛戮兮德祖以俊而銜冤三人者蓋一體兮必且脣亡而齒寒嗟繁城之佐命兮非不巧於自營挈四百之基祚兮與



後村詩話續集卷一  
一身孰爲重輕來者滔滔如江水兮方攘臂而議先生詆文  
華爲浮薄兮至或以比乎盆成苟吾言之獲信兮猶足以鳴  
千古之不平二賦皆佳此篇乃其兄所作有祭田橫墓文之  
意

鄉前輩柯夢得字東海一生苦吟有抱甕集古詩學孟東野  
然稍僻晦有夢蝶絕句云一覺千年一轉機覺來還是夢還  
非當時夢裏如爲蝶便好穿花傍水飛前人所未道也

後村詩話續集卷一

後村詩話續集卷二

宋劉克莊

過秦論云陳涉鋤耨棘矜不銛於鉤戟長鍛謫戍之眾非抗  
九國之師深謀遠慮行軍用兵之道非及曩時之士其語本  
呂覽曰驅市人而戰之可以勝人之厚祿教卒老弱罷民可  
以勝人之精士練材離散係系可以勝人之行陣整齊鉏耨  
白梃可以勝人之長銚利兵賈生可謂善融化者七發云出  
輿入輦命曰蹶痿之機洞房清宮命曰寒熱之媒皓齒蛾眉  
命曰伐性之斧甘脆肥醲命曰腐腸之藥其語亦本呂覽云  
出則以車入則以輦命之曰招麀之機肥肉厚酒命之曰爛  
腸之食靡曼皓齒鄭衛之音命之曰伐性之斧但增損一兩  
字耳此韓公所以有後皆視前公相襲由漢至今用一律歟

樊川阿房宮賦中間數語特脫楊敬之華山賦爾未至若枚  
乘之純犯前作也反騷云君子得時則行不得時則龍蛇何  
必湛然哉朱氏謂雄乃屈原之罪人豈以美新仕莽為龍蛇  
乎然雄語亦本呂覽云一龍一蛇與時俱化秦漢未遠語多  
相犯

善學者君齊王之食雞也必食其跖數千而後足跖雞足踵物莫

不有長莫不有短善學者假人之長以補其短宋景文自名

其集曰雞跖本此

句踐欲報吳大夫逢同諫曰鷺鳥將擊必匿其形呂覽云諸  
搏擊抵噬之獸其用齒角爪牙也必託於卑微隱蔽詞費於  
逢同矣

如臨深淵如履薄冰小雅記也小旻小宛二篇及孝經互見

呂覽以為出於周書誤矣高誘序云不韋以其書暴之咸陽

市門懸千金其上有能增損一字者與千金特人無能增損

者誘以為時人非不能增損憚相國畏其勢耳記誤小雅為

周書而莫敢指摘則懸金何為哉普天之下莫非王土率土

四月篇也呂氏以為舜自作不知何所據或是誤引孟子

晉將攻鄭令叔向聘焉視其有人與無人子產為之詩曰子

惠思我褰裳涉洧子不我思豈無他士叔向歸曰鄭有人焉

不可攻也按涉洧之章乃男女恩怨相爾汝之詞子產言晉

不我撫豈無秦荆可事乎古人舉詞不迫切而意已獨至皆

賴此

獨孤常州名及字至之遠遊賦略云憑東井以俯視識故國  
之城闕千門萬戶遙如蟻穴覓舊山與喬木纔依稀而明滅  
見伊川大道鞠爲戎狄歷陽故人半作魚鼈曩之奔命於市  
朝者如紛紜飛馳講講嗤嗤躡躡躡躡肖翹陸離若蟻蝨之  
聚壤絮蜘蛛之乘遊絲吾乃今日識羣動之變態兮竟然倚  
長空而笑之亦既自得周覽未畢惕然形開萬象如失羣有  
儼以皆作百慮續其未歸乃宿昔之人寰始故時之喧卑問  
之俯仰欣戚無非妄者然後知吾之生也與妄俱生邪氣乘  
之萬緣合併爲憂而患爲虧而盈彼碌碌者自以爲覺猶飾  
妄以沽名甚佳內戎狄魚鼈數語與謫仙古風俯視漢陽川  
茫茫走胡兵流血沾草野豺狼盡冠纓之語相類常州有送

李白之曹南序可是同時厚善其文在蕭穎士李華之間  
常州觀海篇云北登渤海島回首秦東門誰尸造化工鑿此  
天地源瀕洞吞百谷周流無四垠廓然混茫際望見天地根  
白日自中出扶桑如可捫超搖蓬萊峯想像金臺存秦帝昔  
經此登臨冀飛翻揚旌百神會望日羣山奔徐福竟何成羨  
門徒空言惟見石橋足千年潮水痕雖高雅未及陳拾遺然  
氣魄雄渾與岑參適相上下

李華字遐叔山陽古城銘略有漢之衰野鬪羣龍地厭德  
人神助凶姦桀之雄爲王爲公名國大都於兵衝鳳凰嬰  
刃麒麟挂鋒力勝者昌九州承風虞賓不保其躬宿昔  
卿士如鴛如鴻沈沈將校如羆如熊於漢則貳於曹則忠山

陽古城草沒苔封日之將昏狐狸橫蹤峩峩首陽有洛之東  
孤竹二子德音無窮武王翦商不食而終矧臣篡君俯首求  
容義理深長語亦壯浪不在弔古戰場之下

漢唐皆有宦官之禍而唐之爲禍尤烈幽明皇弑張后弑憲  
宗劫僖昭譖汾陽西平族甘露宰相六族餓死六宅諸王終  
於亡唐而後已前輩謂漢宦者與政而唐使之典兵之故入  
司馬附麗伍文固無足議但謀奪宦者兵柄使范希朝韓泰  
總統諸鎮行營兵馬邊上諸將各以狀辭中尉中人大怒曰  
從其謀吾屬必死其手嗟乎此豈伍文之智所及哉八司馬  
多雋才必有爲畫策者事雖不成與晁錯竇武陳蕃何異而  
退之永貞行云北軍百萬虎與羆天子自將非他師一朝奪

印付私黨凜凜朝士何能爲嗚呼天子安能自將不過付之  
中尉及觀軍容使耳以成敗論人世俗不足責退之豪傑亦  
以天子自將北軍爲是而奪印非耶

余有畫山水四橫卷上各有五言一首其一云高峯挂層霄  
遠水沒平野當年居山客半是愛山者橋欲沈崖路險不  
容馬慎勿夸世人正要知者寡其二曰青山爲誰高影壓三  
百里竹深已迷橋荷密半藏水區區名利人坐嗅眞可鄙慨  
想雲屋中恐是古君子其三曰急雨冷捎谿寒煙曉橫塞蒨  
堂來軒車中有隱者在市朝一何有雲水兩無礙笑向塵世  
人不知是何代其四曰通江石泉滑崩崖朝雪重牧兒心苦  
飢牛寒挽不動誰人倚長松胸有九雲夢西風吹屋倒一笑

無與共後題李叔班作不知爲何許人詩劉持約所書持約  
豈非顏氏耶

王黃州集第一篇酬种隱君百韻自敘出處甚謙云長恐先  
生聞倚松成大噓其敘种隱節甚高累數十韻退之於李渤  
不能過一种明逸耳未出山以黃州之剛勁而尊敬之如此  
既出山如王嗣宗之麤鄙乃得以陵暴之士其可不自重哉  
本朝大臣多憐才好士如趙中令於王黃州王文正於楊文  
公晏元獻於宋景文皆爲翹材上客雖丁崖州追仇萊公之  
黨亦不忍害大年呂文靖謫歐尹官隨卽收用至章蔡用事  
坡公始過海矣中令讓官表多黃州之筆可見親密其挽中  
令云商山副使偏垂淚未報當時國士知與幕府少年白髮

之句異矣  
詩以體物驗工巧駱賓王詠挑鐙杖云稟質非貪熱焦心豈  
憚熬終知不自潤何用處脂膏語簡而味長每欲倣此作數  
題未暇也

杜子美笑王楊盧駱文體輕薄然盧病黎賦未易貶駁駱檄  
武氏多警策語王邊上有懷云城荒猶築怨碣毀尚銘功楊  
挽詩云青烏新兆去白馬故人來亦佳句也

盧仝劉義以怪名家仝集中有含曦上人一首云長壽寺石  
壁院盧公一首詩渴讀卽不渴飢讀卽不飢鯨飲海水盡露  
出珊瑚枝海神知貴不知價留與人閒光照夜叉集有范宗  
韓喜得劉先生詩云玉尺沈埋久得之銘篆深揩磨露正色

扣擊吐哀音二詩可見全義對壘

三國志帝魏而卑吳蜀說者謂陳壽蜀人仕屢見黜父為諸葛所髡於劉氏君臣不能無憾而然翁浦仲山作蜀漢書以矯之游丞相亟稱其書仲山亦求序於余余觀其書大意是但書後主為安樂公欲以著其不能負荷之罪復翁書云後主不能負荷史官自貶抑之可也豈可因曹氏貶削之稱會仲山仙去其論未竟後得廬陵貢士蕭常所作續後漢書大綱與仲山同但蕭氏直名其書曰續後漢仲山猶知蜀字耳蕭書後主為少帝按後主嗣位二十五年而後播遷歿時已六十五似非少帝周丞相為蕭序此書謂歐公議正統不黜魏其容章望之著明統論以辨之張南軒經世紀年直以先

主繼獻帝而附魏吳於下方又引習鑿齒漢晉春秋以蜀為正魏為篡考訂詳備惜仲山游公皆未之見余亦近方見之劉斯立病中詩云欲成蹇士賦應作半人詩半人當是用習鑿齒事

放翁少時二親教督甚嚴初婚某氏伉儷相得二親恐其惰於學也數譴放翁不敢逆尊者意與婦訣某氏改事某官與陸氏有中外一日通家於沈園坐閒目成而已翁得年甚高晚有二絕云腸斷城頭畫角哀沈園非復舊池臺傷心橋下春波綠曾見驚鴻照影來夢斷香銷四十年沈園柳老不吹絲此身行作稽山土猶弔遺蹤一泫然舊讀此詩不解其意後見曾溫伯言其詳溫伯名黯茶山孫受學於放翁

後漢書卷三  
韋蘇州詩云身多疾病思田里邑有流亡媿俸錢太守能爲此言者鮮矣若放翁云身爲野老已無責路有流民終動心退士能爲此言尤未之見也

蕭干巖采蓮曲云清曉去采蓮蓮花帶露鮮谿長須急漿不  
是趨前船相隨不覺遠直到暮煙中恐噴歸得晚今日打頭  
風絕似玉臺體

三良事見於詩左傳皆云秦穆殺之以殉坡詩獨云乃知三  
子殉公意亦如齊之二客從田橫今人不復見此等乃以所  
見疑古人此說甚新後讀曹子建三良詩云秦穆先下世三  
臣皆自殘生時共榮樂既沒同憂患誰言捐軀易殺身誠獨  
難乃知子建已有此論

穀千鴛不如養一驢

黃初中疑忌諸王黜削封爵名曰就國實同拘囚斷其來往  
求通親親表云臣遠慕鹿鳴君臣之宴中詠棠棣匪他之誠  
下思伐木友生之義終懷蓼莪罔極之哀每四節之會塊然  
獨處左右惟僕隸所對惟妻子高談無所與發陳意無所與  
展未嘗不聞樂而拊心臨觴而歎息也甚哀切求自試表云  
若陛下出不世之詔効身錐刀之用使得西屬大將軍當一  
校之隊東屬大司馬統扁舟之任必乘危蹈險騁舟奮驪突  
刃觸鋒爲士卒先雖未能禽權馘亮庶効須臾之捷以滅終  
身之媿雖身分蜀境首懸吳闕猶生之年也甚悲壯

與楊德祖書略云詞賦小道子雲先朝執戟之臣爾猶稱壯

夫不爲吾雖薄德位爲藩侯庶幾建永世之業流金石之功  
豈徒以翰墨爲勳績詞賦爲君子哉若吾志不果吾道不行  
將采庶官之實錄辨時俗之得失定仁義之理成一家之言  
雖未能藏之名山將以傳之同好味其文勢駿壯退之答崔  
立之書本此

曹仲雍哀詞略云昔后稷在寒冰鬪穀在楚澤衣鳥憑虎而  
無災今文茵無寒冰之慘羅幃綺帳煖於翔鳥之翼幽房閒  
宇密於雲夢之野慈母良保仁乎鳥虎之情文字麗密有如

此者

自三良以下皆  
見曹子建集

天台林憲字景思自號雪巢尤遂初序其集略云富與貴人  
之所可得而才者天之所甚靳景思取天所甚靳者多則不

能兼人之所得固宜然則才者實致窮之具人何用有此而  
天亦何用靳此此未易以理曉也誠齋演遂初之說爲雪巢  
之詞云且吾與詩人同爭夫天之所靳是天之橫民也同犯  
夫天之所惡是又天之橫民也治橫民者宜以橫政既與詩  
人同爲橫民矣欲不與一人同受橫政可乎余曰子旣無遺  
力以取所靳無懼心以犯所惡無怨言以安所致然則延之  
爲君惜過也余舉延之語以唁君亦過也然君必欲專享詩  
人才之所致者而不顧不悔以不辭造物之橫政亦過也二  
公可謂善諫矣

雪巢讀陶詩云吾觀淵明詩了不在言賦有如太和氣周行  
不停駐時與春爲風融夷物華布而未見用力萬物向榮處



時與秋爲月浩然無點注江山滋清絕宇宙靡纖汙乃知淵  
明詩本不在詩故邂逅吐所有氣象隨所寓乞食不爲拙華  
軒不爲慕歸來不爲高折腰不爲沮義皇平步超無懷貞雅  
素簡澹豈能盡學者漫馳步獨有無絃琴明明一斑露雖甚  
清絕然太輕快集中長篇皆類此要須更隳括以韋柳乃善  
蕪城賦云板築雉堞之殷井幹烽櫓之勤崒若斷岸疊似長  
雲觀基局之固護將萬祀而一君出入三代五百餘載竟瓜  
剖而豆分歌堂舞閣之基弋林釣渚之館吳蔡齊秦之聲魚  
龍爵馬之玩皆薰歇燼滅光沈響絕園葵賦云仕非魯相有  
不拔之利賓惟二仲無逸馬之憂若乃鄰老談稼女媪歸桑  
拂此葦席炊彼稌梁登壺援醢曲瓢卷漿乃羹乃淪堆鼎盈

筐甘旨藉脆滑柔芬芳消淋逐水潤胃調腸鮑明遠賦有思  
致然太拘狹開拓不去略存二賦于此詩工於賦押韻用事  
往往切題岑參賈至輩句律多出於鮑然去康樂地位尚遠  
登大雷岸與妹書六百餘字無一字及家事皆述道途辛苦  
古今陳迹山夔水怪羈愁旅思辭極典雅爲集中佳作  
燕公之文如榭木枝幹締御名大廈上棟下宇孕育氣象可以  
變陰陽而閱寒暑坐天子而朝羣侯許公之文如應鐘鼗鼓  
笙簧鐔磬崇牙樹羽考以宮懸可以奉神明享宗廟李北海  
之文如赤羽元甲延亘平野如雲如風有羆有虎闐然鼓之  
吁可畏也賈常侍之文如高冠華簪曳裾鳴玉立於廊廟非  
法不言可以望爲羽儀資以道義李員外之文則如金輿玉

輦雕龍綵鳳外雖丹青可掬內亦體骨不飢獨孤常州之文如危峰絕壁穿倚電漢長松怪石傾倒谿壑然而略無和暢雅德者避之楊崖州之文如長橋新御名鐵騎夜度雄震威厲動心駭目然而鼓作多容君子所慎權文公之文如朱門大第而氣勢宏敞廊廡廡戶牖悉周然而不能有新規勝概令人竦觀韓吏部之文如長江秋注千里一道衝颿激浪汗流不滯然而施於權激或爽於用李襄陽之文如燕山夜鴻華亭曉鶴嘹唳亦足驚聽然而才力偕鮮瞥然高遠故友沈諮議之文則隼擊鷹揚滅沒空碧崇蘭繁榮曜芳揚蕤雖迅舉秀擢而能沛艾絕景其他握珠璣奮組繡者不可一二而紀矣以上皇甫湜評唐十一家之文可與法帖所載梁武帝

評三十四家書對觀

出世篇云生當爲大丈夫斷羈羅出泥塗四散號呶擾無隅埋之深淵飄然上浮騎龍披青雲汎覽遊八區經大山絕巨海一長吁西摩月鏡東弄日珠上始天之門直指帝所居羣仙來迎塞天衢鳳凰鸞鳥乘金輿音聲嘈嘈滿太虛旨飲珍食兮照庖廚食之不飫飲不盡使人不陋復不愚且且狎玉皇夜夜御天姝當御者幾人百千爲翻宛宛舒舒忽不自知支消體化膏露明湛湛無色茵席濤俄而散漫斐然虛無翕然復搏搏久而蘇精神如太陽霍然照清都四支爲琅玕五臟爲璠璣顏如芙蓉頂如醍醐與天地相終始浩漫爲娛下顧人間溷糞蛆湜以軻雄自擬然此篇放曠超軼軻雄

不道也文字亦未及大人賦隋唐人言語耳

闔廬之死金玉其墓黔婁之死首足不覆

皇甫湜

吳融詩阿對泉頭一布衣自注云阿對是楊伯起家僮常引

泉灌蔬

韓致光吳子華皆唐末詞臣位望通顯雖國蹙主辱而賦詠  
倡和不輟存於集者不過留連光景之語如感時傷事之作  
絕未之見當時公卿大臣往往皆如此

蝸賦云夜風索索緣隙憑壁弗聲弗鳴潛此毒螫厥虎不翹  
厥牛不齒爾今何功既角而尾

虎賦云西白而今其獸惟虎何彼列辰自虎而鼠善人瘠讒  
人肥汝不食讒畏汝之飢

惡馬賦云彼騎而嚙孰爲其主彼芻而蹶孰爲其圉五里之

堠十里之亭癯燥飢渴不擇重輕亭有饒吏曝之爲臘又毒

其吏立死於樞

已上三賦  
見玉溪集

玉溪與陶進士書夫所謂博學宏詞者豈容易哉天地之災  
變盡解矣人事之興廢盡究矣皇王之道盡識矣聖賢之文  
盡知矣天下及蟲豸草木鬼神精魅一物以上莫不開會此  
其可以當博學宏詞者耶恐猶未也設他日或朝廷或持權  
衡大臣問一事詰一物小如毛甲而時脫有不能盡知者則  
是博學宏詞者當其罪矣私自恐懼窘若囚械後幸有中書  
長者曰此人不堪抹去之大快樂曰此日後不能知得東西  
左右亦不畏矣又云常時祝願得時人曰此物不識字此物

不知書是我生獲忠肅之謚也其論激矣  
前人記蔡京權重喜閩漕鄭重可簡餽茶就封皮批進修撰  
除運副遠相晚亦權重病起見二雜吐綬愛玩久之問誰所  
致左右以宗少梁成大對亦就劄子批除刑部侍郎人以爲  
戲筆也已而命下西山先生云其權重於蔡氏耳  
遠相當國久從官多由徑而得端平初鶴山召對云侍從之  
臣有獻納而無論思亦雅謹也

鄭谷送人下第云吾子雖云命鄉人懶讀書七言云愁破方  
知酒有權皆有新意

薛能云詩深不敢論鄭谷云暮年詩律在新句更幽微詩至  
於深微極玄絕妙矣然三子皆不能踐此言唐人惟韋柳本朝

惟崔德符陳簡齋能之

溫飛卿蘇武廟云迴日樓臺非甲帳去時冠劍是丁年甲帳  
是武帝事丁年用李陵書丁年奉使皓首而歸之語頗有思  
致

南豐序南齊書云爲二典者所記豈獨唐虞之蹟耶并與其  
精微之意而傳之方是之時豈特任政者皆天下之士哉蓋  
執簡操筆而隨者亦皆聖人之徒也曲阜行穎濱中書舍人  
制云在典謨訓誥誓命之文學者宗之以爲大訓蓋當是時  
豈獨綱紀法度後世有不能及哉至於言語侍從之臣皆聖  
人之徒亦非後世之士所能髣髴也詞意全本南豐其家庭  
素所講貫也

橫渠絕句云渭南涇北已三遷水旱縱橫數畝田四十二年  
居陝右老年生計似初年又云兩山南北雨冥冥四牖東西  
萬木青面似骷髏頭似雪後生誰與屬遺經其清苦如此所  
以為一代儒宗

曹操欲使十吏就蔡琰寫邕遺書琰曰男女不親授乞給紙  
筆真草惟命妻胡之恥豈不大於親授所謂不能三年之喪  
而總小功之察歟

義山孔明廟云玉壘經綸遠金刀歷數終誠齋徐孺子墓云  
舊國已禾女荒阡猶石翁比山谷司馬寒如灰禮樂卯金刀  
之句尤精確

義山善用事哭劉蕡云空聞遷賈誼不待相孫宏自應制科

至謫此止以十字道盡

温飛卿過韋籌草堂七言云醉後獨知殷甲子病來猶作晉  
春秋和靖五言云隱非秦甲子病著晉春秋和靖非蹈襲者  
當時偶然相犯

魯恭王壞孔子宅以廣其居升堂聞金石絲竹之音乃不壞  
宅此謂魯生及孔氏之後有絃誦於其間者爾而疏云懼其  
神異乃止不壞誤矣高祖誅項籍引兵圍魯魯諸儒猶誦  
習禮絃歌之音不絕此豈亦有神異耶解經如此豈不語怪  
神之義哉

半山擬寒山云我曾為牛馬見草豆歡喜又曾為女人歡喜  
見男子我若貞是我只合長如此若好惡不定應知為物使

後山言集卷三  
堂堂大丈夫莫認物爲己後有慈受和尚者擬作云姦漢瞞  
漳漢漳漢總不知姦漢做驢子卻被漳漢騎半山大手筆擬  
二十篇殆過之慈受一僧耳所擬四十八篇亦逼真可喜也  
寒山詩麤言細語皆精詣透澈所謂一死生齊彭殤者亦有  
絕工緻者如域中嬋娟女玉佩響珊瑚鸚鵡花閒弄琵琶月  
下彈長歌三日繞短舞萬人看未必長如此芙蓉不耐寒殆  
不減齊梁人語此篇亦見山谷集豈谷喜而筆之後人誤以  
入集歟

元康八年機始以臺郎出補著作游乎祕閣而見魏武帝遺  
令愾然太息傷懷者久之客曰夫始終者萬物之大歸死生  
者性命之區域是以臨喪殯而後悲覩陳根而絕哭今傷心

百年之際興衰無情之地意者無乃知哀之可有而未識情  
之可無乎夫日蝕由乎交分山崩起於朽壤亦云數而已矣  
然百姓怪焉者豈不以資高明之質而不免卑濁之累居常  
安之勢而終嬰傾離之患故乎夫以回天倒日之力而不能  
振形骸之內濟世夷難之智而受困魏闕之下已而格乎上  
下者藏於區區之木光於四表者翳乎藪爾之士雄心摧於  
弱情壯圖終於衰志長算屈於短日遠蹟頓於促路嗚呼豈  
特瞽史之異闕景黔黎之怪頽岸乎觀其所以顧命冢嗣貽  
謀四子經國之略既遠隆家之訓亦宏又云吾在軍中持法  
是也至於小忿怒大過失不當效善乎達人之讜言矣持姬  
女而指季豹以示四子曰以累汝因泣下傷哉曩以天下自

後漢書卷二  
任今以愛子託人同乎盡者無餘而得乎亡者無存然而婉  
變房闈之內綳繆家人之務則幾乎密歟又曰吾媿好妓人  
著銅雀臺於臺堂上施六尺牀張總帳朝晡設脯繡之屬月  
朝十五日輒向帳作妓汝等時時登銅雀臺望吾西陵墓田  
又云餘香可分與諸夫人諸舍中無所爲學作履組賣也吾  
歷官所得綬皆著藏中吾餘衣裘可別爲一藏不能者兄弟  
可共分之旣而竟分焉亡者可以勿求存者可以勿違求與  
違不其兩傷乎悲夫愛有大而必失惡有甚而必得智惠不  
能去其惡威患不能全其愛故前識所不用心而聖人罕言  
焉若乃繫情累於外物留曲念於閨房亦賢俊之所宜廢乎  
於是遂憤懣而獻弔云耳士衡此作詞簡而事甚備語絕而

意愈新當爲魏晉間文章第一序勝於文

弔魏  
武文

後村詩話續集卷二

Blank space for text in the right-hand page.

後村詩話續集卷三

宋劉克莊

放翁詩云藥來賊境靈何益米出胡奴死不炊上句用柳公  
 綽事公綽節度山南東道有道士獻丹藥問所從來曰自薊  
 門時朱克融方叛公綽曰藥自賊境來雖驗何益棄藥而逐  
 道士殆天為下句設此奇對甲子七月讀唐書  
 記時年七十八  
 揚雄集六卷四十三篇劇秦美新之作在焉法言末云自周  
 公以來未有漢公之懿又曰其勤勞則過於阿衡此時莽猶  
 未篡此語不過如今人稱頌權貴人功德耳及莽既篡雄縱  
 不能如許由洗耳魯連蹈海然與龔勝同時莽使使者以印  
 綬強起勝勝稱病篤臥以手推去印綬勝兩子及門人進說  
 云云勝曰吾受漢家厚恩今年老且暮入地豈以一身事二



姓下見故君乎不食而死雄亦仕漢者莽篡不能去視勝可  
媿死矣美新之篇方且盛稱皇帝陛下配五帝冠三王開闔  
以來未聞宜命賢哲作帝典一篇襲舊二爲三以示罔極又  
自言有顛眴病恐先犬馬填溝壑長恨黃泉故作此篇以獻  
余爲寧顛眴病死此文豈可作哉朱氏書莽大夫揚雄卒書  
其罪矣而昌黎公荆公涑水公皆推重或以配孟子何也  
元后誅略云天之所廢人不敢支又云皇天眷命黃虞之孫  
歷世運移屬在新聖又云漢廟黜廢移安定公凡累百韻案  
元后王莽之姑然擲傳國璽缺其角聞翟義起兵以爲是見  
漢宗廟毀壞有怨言人心之公不可磨滅如此雄士人也顧  
以賊莽爲新聖以漢廟黜廢爲天之所壞乎

劉子政集二卷有九歎用騷體未有杖銘云歷危乘險匪杖  
不行年耆力竭匪杖不强有杖不任顛跌誰怨有士不用害  
何足言藟蔗雖甘殆不可杖佞人悅已亦不可相杖必取任  
不必用味士必任賢何必取貴語簡而有味

文君眉色如望遠山臉際常若芙蓉十八而寡悅長卿之才  
而越禮焉長卿死文君爲誄傳於世

揚雄夢吐鳳凰而作太玄經仲舒夢蛟龍入懷而作春秋繁  
露

公孫弘食故人高賀以脫粟飯覆以布衾賀告人曰弘內服  
貂蟬外衣麻裊內廚五鼎外膳一肴於是廟庭疑其矯爲弘  
歎曰寧逢惡賓勿逢故人

吳章爲王莽所殺弟子皆更易姓名以從他師惟司徒椽平陵曹敞獨稱章弟子收葬其尸

目矚得酒食鐙花得錢財乾鵲噪而行人至蜘蛛集而百事喜故目矚則呪之鐙花則拜之乾鵲噪則餒之蜘蛛集則放之

枚舉文章敏疾長卿制作淹遲而長卿首尾溫麗枚舉時有累句揚子雲曰軍旅之際戎馬之閒飛書走檄用枚舉廟廊之下朝廷之中高文大冊用相如

安定嵩真玄菟曹元理並明算術成帝時人真自算其壽七十三綏和元年正月二十五日晡時死書壁記之至二十四日晡時死其妻曰見真算時長下一算慮脫有旨不敢告今

果校一日真又曰北邙青隴上孤檟西四丈所鑿之入五尺吾欲葬此地及死往掘得古時空槲遂以葬焉元理嘗從其友人陳廣漢廣漢曰吾有二圃米忘其石數子爲計之元理以食箸十餘轉曰東圃七百四十九石八升七合又十餘轉曰西圃六百九十七石八斗遂大書圃門後出米西圃六百九十七石七斗九升有一鼠大堪一升東圃不差圭合元理後復過廣漢告以米數元理以手擊牀曰遂不知鼠之殊米不如剝面皮矣廣漢爲取酒鹿脯數片理復算曰諸蔗二十五區收一千五百三十六枚蹲鴟三十七畝收六百七十三石牛產二百犢萬雞將五萬雛羊豕鵝鴨皆道其數果齧肴蔽悉知其所曰資業之廣何供饋之徧廣漢慚曰有倉卒客

無倉卒主人元理曰俎上蒸豢一頭廚中荔枝一棹皆可爲  
設廣漢再拜謝罪自入取之盡曰爲歡

公孫弘爲國士所推上爲賢良國人鄒長倩以其貧解衣裳  
衣之釋所著冠履與之又贈以生芻一束素絲一襪撲滿一  
枝書遺之曰撲滿者以土爲器以蓄錢貝有入竅而無出竅  
滿則撲之士有聚斂而不能散者將有撲滿之敗可不戒歟  
弘爲高賀鄒長倩兩故人所輕如此豈非曲學阿世以納侮  
歟

梁孝王遊於忘憂之館集諸遊士使各爲賦枚乘爲柳賦路  
喬如爲鶴賦公孫詭爲文鹿賦公孫乘爲月賦羊勝爲屏風  
賦韓安國作几賦不成鄒陽代作鄒陽安國罰酒三升賜枚

乘路喬如絹人五匹

自揚雄夢吐鳳已下皆見西京雜記葛洪所集也末云洪家  
有劉子駿漢書一百卷無首尾題目但以甲乙丙丁紀其卷  
數歆欲撰漢書編錄漢事未詮次而亡故書無定本雜記而  
已後好事者以意次第之始甲終癸爲十秩秩十卷合爲百  
卷試以此記較班固所作殆是全取劉書小有異同耳固所  
不取不過二萬許言今鈔出爲二卷名曰西京雜記以裨漢  
書之闕爾後洪家遭火書籍都盡此兩卷在洪巾箱中故得  
猶在劉歆所記世人希有縱復有者多不足備恐年代稍久  
歆所撰遂沒洪家此書二卷不知出所故序之云耳

尹少稷詩若澹泊而有義味其庸醫行云南街醫工門如市

爭傳和扁生後世膏肓可爲死可起瓦屑蓬根盡珍劑歲月  
轉久術轉疏十醫九死一活無北市醫工色潛動大字書牌  
要驚眾偏收棄藥與遺方縱有神丹亦無用實者爲虛熱爲  
寒幾因顛倒能全安君不見形神枵然臥一室醫方爭功藥  
無必左手檢方右顧金兩手雖殊皆劍戟似諷當時主和戰  
者聞逆亮入寇律詩云本來飢飽非同鼎安得浮沈自一舟  
又云異日是非憂史謬終身寒餓羨錢愚詞不迫切而意獨  
至矣少稷及接呂居仁曾吉甫議論在山中讀書二十年名  
理極重晚爲大坡因符離之敗攻張魏公父子以附和議遂  
爲公議所貶甚可惜也頃故人陶木仁父宰上饒余託仁父  
傳其集四冊詩居其一

漢益州刺史朱公叔卒門人陳季主議所謚宜曰忠文子陳  
留蔡邕議曰按古之以子配謚者魯之季文孟懿子衛之孫  
文公叔文皆諸侯之臣也至於王室之卿大夫其尊與諸侯  
同故以公配春秋曰劉卷卒葬劉文公公羊傳曰劉卷者何  
天子大夫也經文曰王子虎卒左傳曰王叔文公卒而如同  
盟禮也皆此天子大夫得稱公其禮與同盟諸侯敵之文明  
也又禮緣情臣子咸欲尊其君父故雖侯伯子男之臣自稱  
其君咸得曰公及其卒也異國之人稱之亦然是以邾子許  
男稱公以葬春秋之正義也以例言之則府君王室亞卿也  
有王叔劉氏之比以臣子之辭言之則有邾許稱公之文雖  
無土而安其位是也今日公猶可若稱子則降等多矣懼禮

廢日久將詭時聽周有仲山甫伯陽嘉父吉父賢老之稱也  
宋有正考父魯有尼父配謚之稱也春秋曰孔文禮曰伯某  
父異亡之稱也父雖非爵號與公同禮天子諸侯咸用優賢  
異亡順乎門人臣子所稱之宜可於公父之中擇一處焉斯  
不稱子而已豈此議佳甚韓柳歐曾不能加

邕集十卷大半爲人作碑板如橋元楊秉楊賜皆名臣如朱  
公叔陳仲弓郭林宗范史雲姜肱皆名士至於劉表胡廣之  
碑豈得無媿詞乎又有袁滿來胡根二銘滿來大尉之孫司  
徒之子年十五死根陳留太守之子也七歲死二銘甚美幾  
於諛墓矣

周總字巨勝汝南人再舉孝廉皆委之去梁冀專國前後三

辟不至後太尉司徒各再辟司徒三辟察賢良方正州舉茂  
才又公車時徵託疾杜門里巷無人迹外廷生蓬蒿至延嘉  
二年梁氏誅滅而總卒園典字叔則探綜歷數剖織入冥州  
郡禮命舉至孝莫之能起李休字子材南陽宛人綜七經精  
羣緯玩辭察變獨見前識古今疑義錯謬前人所希論後學  
所不學休盡割判剝散幽暗昭爛郡署五官掾司空胡廣以  
禮優請不至以上三人史逸  
其事見邕集

光和元年七月十日詔書尺一召光祿大夫楊賜諫議大夫  
馬日磾議郎張華蔡邕太史令單颺詣金商門引入崇德殿  
門惟中設都座中常侍育陽侯曹節冠軍侯王甫從東省出  
就都座劉寵龐訓北面楊公南面日磾華邕颺西南面受詔

後漢書卷三  
書各一通尺一木板單兩常侍又諭旨以朝廷焦心聞災恐  
懼每訪羣公卿士而各摺索莫肯盡忠規補闕故特密問勿  
依違生疑諱皆再拜受詔起就坐五人各一處給筆札豈對  
蜺墮雞化皆婦人干政所致乳母趙嬈貲富侔於帑藏工墓  
踰於園陵兩子受封兄弟典郡永樂門史崔王依阻城社大  
爲姦禍暗昧已成非外臣所能審處近者不治無以正遠又  
言廷尉郭禧國之老成光祿大夫橋玄方直前太尉劉寵忠  
實宜爲謀主數見訪問豈立朝持論可謂有所補益然詔問  
之時兩常侍在都座之側乃不敢指言漢寺人亦太橫矣  
爲曹公祠橋公云使持節丞相冀州牧魏王操謹遣掾再拜  
敬祠故太尉橋公公以懿德汎愛博容國念明訓士思令橫

靈幽體翳邈哉晞夷幼以頑鄙之質爲大君子所顧猶仲尼  
之稱顏淵李生之歎賈復士死知己懷此無忘又承從容要  
誓言殂逝之後路有經由不以斗酒隻雞過相沃酌車過三  
步腹痛勿怪雖戲笑之言非至親篤好夫何肯如此辭懷舊  
雅顏潛然淒愴奉命東征屯次鄉里北望貴土乃心陵墓則  
致薄祠公其尚饗

董卓上言辭疾乞就國土羣臣表卓上解國家播遷之厄下  
救兆民塗炭之禍黜廢頑凶援立聖哲謹按漢書蕭何以相  
國金印綠綬位在公卿之上卓功績參侔伊霍以卓  
爲相國位在太傅上帶履上殿入朝不趨此表豈筆也然其  
罪薄於子雲

徐淵子賀周益公致仕啟云清朝無事元老辭榮謂七十致仕當守禮經之常故再三上疏不為文具之舉天子重違其意孤傳以華其歸喜見顏閒甚於掇一第之日身居物外忘其為三公之尊邂逅遂得初心毫髮略無遺恨恭惟某官棲遲盛福俯仰太平開館招賢留作國家之用銜杯樂聖退全明哲之身甫於懸輿已聞冠挂於神武雖是翁嬰鏢皆意復使此老婆娑是負其平生二者豈可得兼萬有足是關學力難與婦謀昔蜀公年未至而乞身潞公耄已及而謀國從其所好匪道之常又豈徒行止合聖人之時出處全君子之致方尋同社其餘年玩象戲於橋中焉知老至作龜巢於蓮上但某夙仰高風驚聞盛舉

觀終始之一節知壽百年昔嗟林下之無人今喜山中之有相涼臺燠館俾知綠野之清閒角扇長壺願備洪崖之灑埽淵子此作甚佳然為詩名所掩

淵子有竹隱集十一卷多其舊作暮年詩無棗本此公會見石湖放翁誠齋一輩人又材氣飄逸記問精博警句巧對天造地設略不戢人喉舌費人思索人品在姜堯章諸人之上集中及晚作尤佳者昔已有絕句詩選今摘其警句於後曉梵魚出聽夜禪石點頭體干挽錢胸中著雲夢皮裏有陽秋觀文自作先生傳誰為故吏碑陳宣子肩成山聳因尋句眼作花昏為勘碑求碑天寒不知翠袖薄日煖但覺玉煙生水仙黃四孃花空朵朵謝三

郎鬢已蒼蒼生燕 索醉寧傾問字酒忍飢不取作碑錢 駒

入隙來元不礙蠅鑽紙出定何妨紙閣 化成銀地佛應喜移

下玉樓天不知雪 北風萬籟自宮徵南日一軒真袴襦南

但欲有衣存妓妾不愁無帳列生徒明簾 劉顯貴為天子

友退之窮作相君書王士頴以布衣自命 我本田家子驅來作長官

政雖無小異民卻自相安靜或焚香坐閒因展畫看庸人擾

之耳只道太和難 巢餘太古雪人有正初風頭如雪絮白

面作春桃紅題雪巢 一鞭加爾膚萬刃割吾腹就令猛於虎何

忍食子肉世無冷鑊湯邑盡活地獄裝太和米綱 老覺此身無

一堪尚牽詩課撚衰髯亦知庭院西風惡直為秋香不下簾

日秋 一瓶儲粟一囊錢兒學箕裘女紡塲更買小工吾事畢

勘書評畫了殘年 可憐玉雪不供愁似倩詩翁作

此君雖強項歲寒相對卻風流瓶花 以鼇巨笑螻蟻

冠山戴笠等逍遙石 不識廬山孤負目不食螯蟹孤負

腹亦知二者古難并行到九江吾事足 巾墊雨佩飛霞

解客嘲攻墨守 通明殿不夜城雪 三雅六經趙德莊送

有酒爵三大伯雅次仲雅小季雅 侯鯖錄陶人為酒器有

酒經晉安人餉人以酒書云酒一經或二經至五經他境人

不達聞錢五經束 帶迎門方知是酒 大官連檣十萬艘小官僅得一葉如漁

舫其中何所有白髮翁媪并兒曹赤腳婢三後執爨蒼頭奴

二前操篙元真筆床閒茶竈吏部酒杯兼蟹螯書緘一箱半

魚蠹一束百軸成牛腰平鋪藁藉薦貓犬賸買棗栗供猿獾

新花鬱屈作菱木清酒蕩搖成濁醪蓬低日覺牛角折竈近



時聞羹釜轅高驥正難望鷓首緩進豈敢爭龍標全家窘拘  
嘆踏蹋長物屏當隨週遭桑樞駟馬各是累人肝薇蕨俱成  
饜不須彼此更相笑未必鬱林之石賢胡椒

舟行

斷貪鞅解見縛懷想宅絕迷道摧慢幢拔惑箭撤睡蓋裂愛  
網彌勒稱讚善財告諸仁者此長者子爲被四流漂泊者  
造大法船爲被見泥沒溺者立大法橋爲被癡暗昏慄者然  
大智鏡爲行生死曠野者聞大聖道爲嬰煩惱重病者調和  
法藥爲遭生老死苦者飲以甘露令其安穩爲人貪恚癡火  
者沃以定水使得清涼云何爲菩薩究竟施佛子此菩薩  
假使有無量眾生或有無眼或有無耳或有無鼻舌手足來  
至其所告菩薩言我身薄祐諸根殘缺惟願仁慈以善方便

舍已所有令我具足菩薩聞之即便施與假使由此經阿僧  
祇劫諸根不具亦不心生一念悔惜但自觀身從初入胎不  
淨微形胞段諸根生老病死又觀此身無有眞實無有漸媿  
非聖賢物臭穢不潔骨節相持血肉所塗九死常流人所惡  
賊作是觀已不生一念愛著之心復作是念此身危脆無有  
堅固我今云何而生戀著應以施彼充滿其願如我所作以  
此開導一切眾生余於身心不生貪愛悉得成就一切智身  
是名究竟施箴譬如乘船欲入大海未至於海多用功力若  
至海但隨風去不假人力以至大海一日所行比於未至其  
未至時設經百歲亦不能及至微細罪生大怖畏以忿  
恨風吹心識火熾然不息凡所作業皆顛倒相解脫長者

後村詩集卷三  
告善財善男子應以善法扶助自心應以法水潤澤自心應  
以境界淨治自心應以精進堅固自心應以忍辱坦蕩自心  
應以智證潔白自心應以智慧明利自心應以佛自在開發  
自心應以佛平等廣大自心應以佛十力照察自心以上見華嚴經  
李格非字文叔濟南人詩文四十五卷文高雅條鬯有義味  
在晁秦之上詩稍不逮元祐末爲博士紹聖始爲禮部郎有  
挽蔡相確詩云邴吉勳勞猶未報衛公精爽僅能歸豈蔡嘗  
汲引之乎挽魯直五言八句首云魯直今已矣平生作小詩  
下六句亦無衰詞文叔與蘇門諸人尤厚其歿也文潛誌其  
墓獨於山谷在日以詩往還而些詞如此良不可曉其過臨  
淄絕句云擊鼓吹竽七百年臨淄城闕尚依然如今只有耕

耘者曾得當時九府錢試院五言云斗暄成小疾亦稍敗吾  
勤定是朱衣吏乘時欲舞文亦佳作文叔李易安父也文潛  
誌云長女能詩嫁趙明誠

文叔祭淇水文云惟先生自詩書以來載籍所記歷代治亂  
九流百氏凡一過目確不忘墜其發爲文章則泛而汪洋密  
而精緻脩然高爽斂然沈毅驟肆而隱忽紛而治絕馳者無  
遺影適澹者有餘味如金玉之就雕章湖海之失涯埃雲煙  
之變化春物之穠麗見之者不能定名學之者不能髣髴筆  
勢略與淇水相頡頏精深可諷味  
初至象郡五言云裨海環國世人持兩足遠  
欲窮畛域心知禹分土未盡舜所陟吾遷桂嶺外仰亦見斗

後村詩話卷三  
十一  
極升高臨大路郵傳數南北山川來時經草樹略已識枝牀  
歸夢長鄉埃行歷歷又云去日有近遠寒暑乃不同手提而  
喙飲嗜慾南北通是邦亦洙泗人可牛與弓良知盡虛市妙  
質老耕農彼時張曲江此時余襄公二子稍穎脫一洗凡馬  
空斯文隔裔土後生昧華風閩中要常袞劍外須文翁又云  
秦扁不南遊醫方略嵐嶂茅黃秋兩淫與瘴蓋同狀呪師烏  
能神適市半扶杖吾欲養黃婆母壯子亦王妙藥只眼前乞  
汝保無恙又云居近城南樓步月時散策小市早收鐙空山  
晚吹笛兒呼翁可歸恐我意慘戚從來堅道念老去倦形役  
天其卒相予休以南荒謫宴坐及此時聊觀鼻端白絕句云  
步履江村霧雨寒竹間門巷繫黃團猶嫌骯髒驚魚鳥父老

相呼擁道看八尺方牀織白藤含風漪裏睡普騰若無萬里  
還家夢便是三湘退院僧南遷後四六比向來兩制尤高簡  
精妙 日狄人傑何如日粗覽經史薄閑文筆箴  
規切諫 風晚有錢癖和嶠之徒

魏元忠文武雙闕名實兩空外示真剛內懷趨附

李嶠有三戾性好榮遷憎人升進性好肥鮮綺羅斷人食內  
衣錦性好行房憎人蓄聲色

唐儉事太宗甚蒙寵遇每食非儉至不餐數年後特憎之遣  
謂之曰更不須相見見即欲殺隋文帝重高頊初甚愛後不  
願見見之則怒

薛師有巧性常入宮闈補闕王求禮上表曰太宗時羅黑能

彈琵琶遂闖為給使以教官人今陛下要懷義入內臣請闔之庶宮闈不亂表寢不出

少府監裴匪舒奏賣苑中官馬糞歲可得錢二十萬貫劉仁軌曰恐後代稱唐家賣馬糞遂寢

宗楚客稱詔薛師釋迦重出觀音再生

尚書左丞張庶廉子利涉為懷州參軍刺史鄧憚曰名父出如此物

楊炯為文好以古人姓名聯用號為點鬼簿賂賓王文好以數對號為算博士盧生之文古今粲粲文質彬彬惜哉不幸有冉耕之疾為幽憂子以釋憤焉

李詳初為劍南一尉言刺史書考不平又曰請考使者即下

筆曰怯斷大事好句小稽自隱不清疑人總考中下

張易之昌宗目不識字手不解書謝表及和御製皆詔附者為之所進三教珠英乃崔融張說輩之作而易之竊名為首逆韋詩什並上官昭容所製昭容上官儀孫女博涉經史研精文筆班婕妤左嬪無以加茲

賀蘭敏之為封東岳碑張昌齡所作也劉子書咸以為劉勰所撰乃渤海劉晝所製晝無位博學有才竊取其名人莫知也

進士章弘智詩君為河畔草逢春心生妾如臺上鏡得照始分明同房常定宗改始字為轉字遂爭此詩皆云我作博士羅道琮判云昔五字定表以理切稱奇今一言競詩取詞

多為主詩始歸宏智轉還定宗張苟兒愛偷文章時為之語  
曰活剝王昌齡生吞郭正一

駱賓王帝京篇倏忽搏風生羽翼須臾失浪委沙泥

再閔殺胡人高鼻者橫死董卓誅闖人無鬚者枉戮

梁武帝使喚槓頭師帝方與人棊欲殺一段子應聲曰殺卻

使出斬之棊罷喚師入使曰陛下令殺卻臣已殺訖帝歎師

臨死何言曰師云貧道前身為沙彌以鑿剗地誤斷一曲鱗

今此報也帝流涕無及

吏部尚書唐儉與太宗某爭道上大怒出為潭州蓄怒未洩

謂尉遲敬德曰唐儉輕我欲殺之卿為我證驗有怨言指

斥敬德唯唯明日對仗云敬德頓首曰臣實不聞頻問確定

不移上怒碎玉珽於地奮衣入良久索食引三品以上皆入

宴上曰敬德今日利益者各有三唐儉免枉死朕免枉殺敬

德免曲從三利也朕有恕過之美儉有再生之幸敬德有忠

直之譽三益也賞敬德金一千羣臣皆稱萬歲

魏元忠忤二張出為端州高要尉二張誅入為兵部尚書中

書令左右僕射不能復直言古人有言妻子具則孝衰爵祿

厚則忠衰

三馬俱用覺魏祚之陵夷五侯並封知漢圖之圯缺周公孔

子請伏殺人伯希叔齊求承行劫牽羊付虎未有出期縛鼠

與貓終無脫口

酷吏以上二十二則  
并見朝野僉載

左思白髮賦云星星白髮生於鬢垂雖非青蠅穢於光儀策

名觀國以此見疵將拔將鑷好爵是縻白髮將拔怒然自詎  
稟命不幸值君年暮逼迫秋霜生而皓素始覽明鏡惕然見  
惡朝生晝拔何罪之故余觀橘柚一皜一曄貴其素華匪尚  
綠葉願戢子之手攝子之鑷咨爾白髮觀世之途靡不迫榮  
貴華賤枯赫赫閭闔藹藹紫廬弱冠求仕童髻獻謨甘羅乘  
軫子奇剖符英英終賈高輪雲衢拔白就黑此自在吾白髮  
臨拔瞋目號呼何我之冤何子之娛甘羅自以辨惠見稱不  
以髮黑而名著賈生自以良材見異不以烏鬚而後舉聞之  
先民國用老成二老歸周周道肅清四皓佐漢漢德光明何  
必去我然後要榮咨爾白髮事故有之以爾所言非不有理  
曩貴耆老今薄舊齒皤皤用期皓首田里雖有二毛河清難

俟隨時之變見歎孔子髮乃辭盡誓以固窮昔臨玉顏今從  
飛蓬髮膚至呢鮮不克終聊用擬辭比之國風

後村詩話續集卷三

後村詩話續集卷三  
宋劉克莊

後村詩話續集卷四

宋劉克莊

陶弼商翁與楊旼樂同時一生仕宦廣西晚守欽順二州集中多佳句前已采其一二他五言如塞上云星落胡王死河窮漢使歸雪山經夏冷天馬入秋肥觀教戰云晉興由帥讓楚敗以師喧行役云陰微辨樵火霽早誤僧鐘雜詩云久聞忘將略多病熟醫書順州云渴蜂銜研水飢蝶嗅屏花七言汴河云柳與揚州今獨在水和隋帝不重來柳州云人心如地少平處天氣似春無冷時送人云冷酒十分無客送輕車一兩有民攀又云兵堪渡海將軍老史不占天處士閒村行云路小馬蹏高復下村深雞唱有如無

李雁湖詩程滄州守宜春刊於郡齋余不及識公初筮豫章

公謫居臨川從曾極景建得余詩簡景建云劉君詩兼鮑庾  
之清俊前與先君同舍不知其郎君詩筆如此晚得宜春本  
摘其警句一二於此紅梅云晚覺鄭公殊嫵媚生憎夷甫太  
鮮明送楊子直知吉州云憂時鐵石孤忠在閱世風花老眼  
空酬景建云新有千絲明曉鏡舊無一畫贊宵衣閒吟此外  
惟須飲老覺人閒萬事非又云向來交態雲翻手靜裏无言  
石點頭雁湖注半山詩甚精確其絕句有絕似半山者已采  
入詩選矣如平生閱世朦朧眼偏向白鷗飛處明如鴉健觸  
翻紅菽菽鷗閒占斷碧鄰鄰皆可諷詠如金谷友玉川奴鷓  
鷓賦蚨蝶圖雙蓬鬢寸草心鶴友雁奴鵬客蠓奴皆的對  
于湖讀中興碑云繡紉兒嘔思塞酥重牀燎香驅羣胡阿環

錦韞無尋處一夜驚眠搖帳柱朔方天子神武謀三郎歸來  
長慶樓樓前拜舞作奇崇中興之功不贖罪日光玉潔十丈  
碑蛟龍盤拏與天齊北望神皋雙淚落祇今何人老文學題  
蔡濟忠所摹御府米帖云生前官職但執戟身後一字萬金  
直當時雷霆下收拾世閒不復有遺逸整整十卷墨猶溼光  
彩激射海爲立平生我亦有書癖對此徇悅心若失口吐汗  
下屢太息十日把玩不得食作牋天公拜稽首乞我此老生  
時一隻手爲君痛飲百斛酒墨池如江筆如帚一掃萬字不  
停肘

石徂徠讀石安仁曼卿舊字安仁學士詩云齊梁無駿骨李杜得秋  
毫後世益纂組變風堪鬱陶奔邁少驥逸禿穴如牛毛試看



安仁詠秋風有怒濤徂徠力排楊劉而推重曼卿如此但前云駿骨後又云驥逸何也寄張從道云臘盡妻未褐天寒子讀書寄明復先生云殘書幾篋蠹寒菊半籬荒惟學春秋者時時到草堂殊有魏野林逋氣格

徐淵子詩用紡塲字斯干詩載弄之瓦注云紡塲也說苑亦云和氏之璧千金之寶用以間紡不如瓦塲

癸未甲申余自桂林入都改秩一日自外歸逆旅主人云有二客訪君不遇留刺而去視之蓋高續古鍾春伯二館職也皆素昧明日往謝高云吾於陸伯敬處見子某詩鍾云吾於南塘處見子四六相約訪君共論此事何相避之深也鍾惠四六一卷高遺疏寮詩二冊未幾鍾貴顯高出館不復入今

皆物故余老矣四六姑置惟詩結習未忘所得疏寮二冊前已摘出一二聯後得其全集數倍於舊老筆如湘絃泗磬多人間俚耳所未聞者有石湖放翁誠齋之風部帙既多不能徧閱姑錄其警語於編以備遺忘五言楊嗣勳惠茯苓云道是青神谷元通白帝厓有松如壯士其魄化嬰兒雲溼侵鴉嘴天寒翦兔絲堯初香摘髓秦後雪凝脂穴動龍蛇窖山空鳥獸悲惟將千歲力白了一生奇送潘德鄰帥廣云風穩琛舟引春歸卉服衙謁吳給事云上皇今百歲近侍不多人寄僧云鹿采花修供猿分石坐禪別僧云夢無全覺久詩只半聯奇聽雪云竹大時聞折梅明不受蠹雜詩云今古憑詩了乾坤賴酒澆忙猶輸使硯嬾尚事持茶買研云汾獻升雲鼎

秦遺蝕雪碑曹娥江云沙冷雁三二天長帆有無七言送蜀  
客云峨眉雪罷添巴水玉壘雲空見蜀星白浪不侵魚復陣  
青苔猶護劍關銘題放翁誠齋倡和云題徧蛟綃乾碧海吹  
將鶴笛上青天道山堂前梅花云太乙神仙遊冊府秦王學  
士凭闌千懷墅云已是飛來鷓鴣了可能落到牡丹花讀曼  
卿詩云東西都漢猶司馬三百年唐只次山荅人云晉書好  
傳偏安石唐世諸人且樂天送歛守云龍尾石須分幾寸牡  
丹花不望頭綱池西云旋作池來分剡曲略教花處似蘇隄  
梅花云相依豈恨移來晚欲訴猶須說到明絕句尤多佳者  
都下云柳生春思拂京華不管閒人也憶家添盡好香那睡  
得月痕如水浸梨花中秋夜登秀臺二絕云青冥風露無人

管醉力飛昇入桂臺月過斗西親挽住伴人騎鶴去蓬萊冰  
娥看盡人間世好事如公不數枚卻喚清罍相揖酌汝聽下  
界息成雷梨花云殿頭催引上清華獨奏春詞喝賜茶帶月  
歸來仙骨冷夢魂全不到梨花晚泊江口云白鷺青煙剡江  
口梅六七分經雪後月肯流連相伴酒隔岸呼船有魚否五  
言古體荅辛幼安云青天不惜日壯士偏知秋自古有奇畫  
如今空白頭彼時當再來吾老不可留天推璧月上星入銀  
河流躔度若此急人生與之浮終夜自起舞無人共登樓典  
謨有陳言河洛非故州黃鶴呼不來誰能理殘裘此篇甚高  
古

杜旃伯高題蘭亭序云君勿笑新亭相對泣卻勝蘭亭暮春

集白頭吟云長門作賦直千金不知家有白頭吟二詩皆有  
味

王元澤詩不滿百度關山篇萬馬度關山關山三尺雪馬盡  
雪亦乾沙飛石更裂歸來三五騎旌旗映雪滅不見去時人  
空流積中血古樂府無以加春懷云朝日上屋角百鳥鳴不  
休豈復辨名字但聞鬧鉤鞞亂我讀書語驚我夢寐游鸞弓  
彈使去暫去還啾啾彈十得一丸窮時來愈稠投弓坐榻上  
咄咄空自尤時節使汝鳴我何爲汝讎絕句云一雙燕子語  
簾前病客無慘盡日眠開徧杏花人不到滿庭輕雨綠如煙  
霏微細雨不成泥料峭輕寒透夾衣處處園林皆有主欲尋  
何地看春歸殊有乃翁思致

獵較集前已摘數聯晚温故讀再錄昔遺忘者七言雪中云  
但能閉戶酌季雅安用馭風尋伯昏種蕪菁作羹云且喜蕪  
菁種得成薑心散出碧縱橫脆甜腩子無反惡肥嫩羔兒不  
殺生樂羊豈斷兒孫念劉季寧無父子情爭似野人茆屋下  
日高澹煮一杯羹歷世云面朋面友風雨散山鳥山花澹薄  
交一榻穉瑜容獨臥滿梓杞菊是兼肴五言云天寒猶著絮  
雨溼欲蒸書吳地人情薄西人客計疏無書堪著眼有法可  
安心絕句云誰倚黃旗喚阿瞞令君終作可憐人蕭然惟有  
鹿門老不帶孫劉一點塵輕陰小雨晚難收柳瘦梅窮卻似  
秋可恨水仙花不語無人共我說春愁春怨云梨花雨送海  
棠花不借胭脂作小紅幾日無人吹玉笛鴛鴦飛入館娃宮

此老筆力有謫仙風骨集中有云老鶴梅拋青嶂裏客星倦倚紫微邊又云而今心服陶元亮作得人閒第一流豈非深悔晚出之誤歟

澹山集多不經人道語此公讀書多氣老筆道題顏魯公像云千五百年如烈日二十四州惟一人朝衣視坎趨前死羽服行山卽此身與客晚集云足下一來同晚步先生小住大村春春晴云四野綠迴春補闕亂山塵淨雨修容嬾軒云經年不濯子春足半月才梳叔夜頭止酒云縉紳處士議所以將軍貴人須畢之月夜云琉璃虛空甚圓滿紫磨山川更新鑄梅花絕句云姑射山頭冰雪仙人閒一見便豐年卻應羞死琴臺女不得乃翁分一錢荷珠云客來切勿令觀此蕙苾

猶能困伏波如大槐小草木偶芻靈朝采夜光立豹蹲鳴口代手談木上座麴先生千金子萬玉妃童欺我老農報余春下巖研正焙茶皆的對

王逢原集張巡篇云祿兒射火燒九天鬼手不撲神聽旃羣庸仰口不肯唾及出長喙噓之燃睢陽城窮縮死鼈危繫一髮懸九淵巡噴睨遠兩背折怒嚼齒碎鬚張肩恨身不毛劍無翼不能飛去殘賊燕翁軀腥刀兒磔俎日嚼肉血猶經年霽雲東攘兩臂去西來才有九指還胸中憤氣吐不散去隨箭入浮圖塲忠窮智索莫自効更嚮愛妾嘗飢涎我疑沒日賊不食恐其肉醜死不痊又疑身骨不化土定作金鐵埋重泉何時山移陵谷變發出鼓鑄戈或鋌吾如得之願有用不

後山詩集卷四  
誅已然誅未然此作出盧仝上交難贈杜漸云兩鼠共謀渴  
相飲期入水一鼠下絕缶一鼠上銜尾前鼠以之跌後鼠以  
之死鼠死何足噫夫人才可悲平地把手笑乘崖撥足擠賊  
防易爲力壯健完藩籬交防難爲人笑面惡肝脾前日信其  
是今日悟其非安得先知明有如灼火龜然則奈之何期子  
同吁噉此必有爲而作誰氏子云嫋嫋誰氏子鮮鮮一何姝  
來奔富人家妻與富人俱嚴妝問夫子我豈彼室如夫子笑  
遣之彼寧與汝都升堂由阼階德色溢以舒親賓不敢笑退  
語相唏吁高堂聚羣婢唯諾相恣睢家事忽不圖頤指取自  
如朝令折桂薪暮遣藩籬除風雨半夜來百釁生不虞屋壓  
盜隨至夫死別嫁夫東鄰有淑子性不事鉛朱端居大人求

正色不願諛清鏡見白髮行謀不顧閭不知愛妻人取舍何  
異歟詞意似王建張籍哭詩云目雖淚所出由來心乃源自  
日曬我面意欲乾決瀾而不照我心我淚何由乾況在重雲  
遮使我何自安又云日存多所見不若無目完山中云山中  
亦有出山路山人自不與世通拂衣行起飲流水枕書就臥  
聽松風地寬江河競搖蕩天闊日月爭西東乾坤自爲四時  
役萬事不到幽人胸集中新意快句不可勝記如舟方乘兮  
人不吾以覆且溺兮我同人死東蒿爲楹樗爲柱居者略不  
憂其顛吾觀世之人陷此者不啻火立足向燔豈期  
自悟不思跳出乃欲躄井方崩兮治隧屋且  
竭河論翹水都投大海爲酒池中閒  
不盈掬日益醞釀

成澆滴不知漳風竟何適萬手齊舉招不迴五言云清醒甘  
澤畔富貴奈播閒劍折終羞屈蘭遺不改香其論文云星緯  
織成鋪地錦歐冶鑄出春天矛文章曰組緯玉機飛金梭雖  
有真繩結作張麟羅老成終到孔窮死亦爲顏不能繩我  
怠何力禁人叛不知里社歌不可郊廟施梅花云那知後世  
無所用兒嚙不美還棄之贈王平甫云古人誰云朽死魄如  
可召其詠物馴鹿云祇消指馬相可有逐原人豺狼好牙爪  
應笑角如麟水車云上潤業已然下竭將奈何雁云關塞風  
高夜江湖木落秋紙鳶云才乘一線憑風去便有愚兒仰面  
看春雪云蟄戶開重瑾冰魚上復沈東園云天桃未老已抽  
青約略朱旗冠翠纛雖然素李不爭華似洗朱丹誇瑩皎昔

讀廣陵集草草用朱筆點出妙處子修弟手記余所點者於  
冊晚見子修所鈔老矣又偏盲不能盡閱冊子遂再選一番  
本朝諸人惟逢原別是一種如靈芝慶雲出爲祥瑞半山崛  
強於歐蘇無所置喙非苟歎伏後生者

逢原集中有呂吉甫所答五言云東海有滄溟西極有崑崙  
子已具舟車我亦爲楫輪吉甫能爲此言豈非近朱者赤耶  
方豐之德亨及與呂紫薇交游放翁序其詩梅花云天女終  
降大居士登伽惟撓小乘禪又云老夫六賊銷磨盡時爲幽  
香一敗禪漁父云已攜巨鯉換新秬尚有鱗儻得自烹聞道  
烹鮮易煩碎呼兒無用苦爲羹歷崎道中云漠漠春陰接海  
低濛濛晚雨傍山飛半畝古埭無人過時有村童護鴨歸海

口云白是鹽堙青是麥誰云斥鹵不堪田五言云魂夢無金印生涯有瓦盆

楊大年西崑酬唱集序略云子景德中忝佐修書今紫微錢君希聖祕閣劉君子儀並負懿文尤精雅道余得以游其牆藩而資其模楷因以歷覽遺編研詠前作更迭唱和互相切劘入蘭游霧雖獲益以居多觀海學山歎知量而中止雖榮於託驥亦媿乎續貂凡五七言律詩二百四十七章其屬而和者又十五人析為二卷取玉山策府之名命之曰西崑酬唱集今考十五人者丁謂刁衍張詠晁迥李宗諤陳越李維劉騰舒雅崔遵慶任隨錢惟濟有名秉不著姓王沂公只有一篇在卷末

放翁長短句云元知造物心腸別老卻英雄似等閒祕傳一字神仙訣說與君知只是頑一句丁寧君記取神仙須是閒人作君記取封侯事在功名不信由天元來只有閒難得青史功名天卻無心惜漁父詞云一竿風月一蓑煙雨家在釣臺西住賣魚生怕近城門況肯到紅塵深處潮生理權潮平理纜潮落浩歌歸去時人錯把比嚴光我自是無名漁父鷓鴣天云杖屨尋春苦未遲洛城櫻筍正當時三千界外歸初到五百年前總自知吹玉笛渡清伊相逢休問姓名誰小車處士深衣叟曾是天津共賦詩好事近云混蹟寄人閒夜夜畫樓銀燭誰見五雲丹竈養黃芽初熟春風歸從紫皇遊東海宴賜谷進罷碧桃花賦賜玉塵千斛又云平旦出秦關雪

後世言詩集卷四  
色駕車雙鹿借問此行安往賞清伊修竹漢家宮殿劫灰中  
春草幾回綠君看變遷如許况紛紛榮辱朝中措云怕歌愁  
舞嬾逢迎妝晚託春醒總是向人深處當時枉道無情關心  
近日嗁紅密訴翦綠深盟杏館花陰恨淺畫堂銀燭嫌明情  
知言語難傳恨不似琵琶道得真其激昂感慨者稼軒不能  
過飄逸高妙者與陳簡齋朱希真相頡頏流麗綿密者欲出  
晏叔原賀方回之上而世歌之者絕少

項平庵祭辛幼安文云人之生也能致天下之憎則其死也  
必享天下之名豈天之所生必死而後美蓋人之所憎必死  
而後止嗚呼哀哉死者人之所惡公乃以此而為榮予者公  
之所愛必當與我而皆行苟旦暮而相從固余心之所愛尚

眠食以偷生恨公行之不待自昔哀誄未有悲於此者

平庵五言絕句武夷鐵笛亭云夜嘯千崖裂朝吟萬象蘇山  
人大自在無淚捋君鬚諸葛祠堂云羽扇白綸巾堂堂六尺  
身我評秦漢下宇宙只斯人永州云日日長沙岸看雲只念  
家如何永州夢偏愛在長沙欵乃曲云靄乃出深谿湘山日  
落時若非堯女哭卽是楚神嗁雜五言如隆中評劉牧云阿  
琦去梯策尚識抱膝公誰云豚犬愚頗復勝乃翁又平生萬  
事僞惟有病是實時方攻僞其言如此六言和王仲衡尚書  
云聖賢生世不數文章何代無人一言蔽思無邪三萬解曰  
若稽

七言八句讀三國志云曹劉有志混華戎無奈吳兒兩炬紅



赤壁燄燒雲夢澤夷陵光照永安宮人閒自此鼎三足天上  
無因日再中惟有葛公心未死夜深寒月照孤忠路旁有因  
梅竹以編籬者云已生野外更籬根仍與蚩氓補斷垣博士  
低頭乘虜障王姬掩面嫁烏孫風枝雨葉無生意粉面朱脣  
有淚痕說與調羹吹律事老農那信腐儒言雜七言如送水  
心淮東總領云藍縷疾耕家四壁鐵衣高臥日千金四朝餉  
士前無古一旦和戎患至今如送邕州高教授云君行回雁  
前頭路我上杜鵑無處船夔州永安宮云吳娃解掩夫羞面  
難繫劉郎一寸心公瑾欲以子女  
玉帛留備於吳  
送陳上齋納官還鄉云正爾釣絲江上去依然羽扇篋中情  
藏秃筆云莫欺貧士無檀施時向文房度一僧澗上云全家

寢食琤瑋上韶濩聲中過百年和人云窗中見日知晨暮瓶  
裏看花記歲時新讀子書多乙者舊吟詩稿盡丁之詠拋毬  
云綵毬丹桂依春風寒食清明罷繡工漠北將軍貪躡踴豈  
知兵法在吳宮

七言絕句春日隄上云高高下下十五里白白紅紅千樹花  
總在疏籬斷垣裏背隄臨水少人家見梅云草枯葉脫四山  
童萬里長天一目空數點寒稍著紅蕊人閒驚喜見春風次  
韻羅郢州送別云江上相留不肯留渡江沿岸卻回頭漢江  
東去人西去不見高城始是愁櫛州路口小雨云三十年前  
過此時一雙青髻縮青絲如今舊雨猶相記只傍星星白處  
吹落帽臺云千山搖落萬林空數點黃花酒盞中半破接籬

誰耐管已將身世付西風分明屈子獨醒愁故作南華醉夢  
遊豈是晉人真愛酒渠儂心事更悲秋上冢云兒時飛鞚得  
金隄掣電驚風過馬蹏今日筇輿搖醉帽城東一日到城西  
與潘德文倡和糟蟹詩押險韻至六首皆新奇而首篇尤工  
大戴笑汝無文空雙螯小戴笑汝有筐如子皋太玄笑汝長  
郭索入穴慚螿升慚獐知心但有畢吏部臥起與汝同酒糟  
後來愛者蘇長公亦只許汝中山醪固知合向一丘老安得  
上與三辰翺長公貌喜心未敬雖羨微生猶惡饜我疑吳儂  
修稍怨和稭醢汝償民膏雖然因此得長醉痛貶未必非深  
衰又疑畢叟妬劉掾曾以螟蛉輕二豪故圓左手就箕踞持  
螭籍糟成兩高

石湖詩三十四卷五言如思陵輓詞云寇降干猱猱胡拜兩  
單于首山銅鼎就前殿玉卮空病中云目眚浮珠佩聲塵籟  
玉簫注水瓶花醒吹薪鼎藥潮丙午元日云童心仍竹馬暮  
境忽蒲輪春晚云繡地紅千點平橋綠一篙棟花來石首穀  
雨熟櫻桃詠懷自嘲云退閒驚客至衰嬾怕書來挽趙密太  
保云鬢凋猶陸戟心在惜弋弓  
六言久病或勸遊適云羸如蓍婦多忌倦似田翁作勞玩具  
僧梳別履權棕丁尾龜毛請息齋云洞門晝挂鐵鎖閣道秋  
生綠苔蒼下略同龜伏瓜中且免蠅來又云勞君敬枯木耳  
怨汝見溼灰焉  
七言發合江云船尾竹林遮縣市故人猶自立沙頭將至吳

後村詩集卷四  
中云新事略從年少問故人差覺坐中稀玉麟堂會客云不  
用忙催銀燭上醑醺如雪照黃昏秋晚閒吟云旁若無人鼠  
飲視麾之不去蠅登盤丙午新正云病憐椰栗隨身慣老覺  
醑酥到手遲又云人情舊雨非今雨老境增年是減年口不  
兩匙休足穀生能幾屐莫言錢行營壽藏云縱有千年鐵門  
限終須一箇土饅頭偶書云已甘滑掬勤爲圃休向滔滔苦  
問津親鄰招集強往便歸云氣衰況復三而竭心賞尤於四  
者難一龕云與老有情冬後暖去仙無幾日高眠  
七言絕句昌化云翠染南山擁縣門一洲橫截兩谿分長官  
日永無公事臥聽灘聲看白雲長沙王墓云英雄轉眼逐東  
流百戰工夫土一抔蕎麥茫茫花似雪牧童吹笛上高丘處

州鶯花亭云山碧叢叢四打圍煩將舊恨訪黃鸝纈林霜後  
黃鸝少須是愁紅萬點時續長恨歌云別後相思夢亦難東  
虛雲路海漫漫仙凡頓隔銀屏影不似當年取次看楓橋云  
朱門白壁枕灣流桃李無言滿屋頭牆上浮圖路旁堠送人  
南北管離愁次韻陸務觀云離合紛紛怕遠遊遠遊仍怕賦  
登樓何須一望三千里望盡西州轉更愁田園雜興云騎吹  
東來里巷喧行春車馬鬧如煙繫牛莫礙門前路移繫門西  
碌碡邊汗萊一稜水周圍歲歲蝸廬沒半扉不著菱青難護  
岸小舟撐取葑田歸槐葉初勻日氣涼蔥蔥鼠耳翠成雙三  
公只得三株看閒客清陰滿北窗采菱辛苦廢犁鉏血指流  
丹鬼質枯無力買田聊種水近來湖面亦收租古鼎作香鑪

云雲雷縈帶古文章子子孫孫永奉常辛苦勒銘成底事如  
今流落管燒香

石湖長短句醉落魄云馬蹏塵撲春風得意笙簫逐款門不  
問誰家竹止揀紅妝多處燒銀燭碧雞坊裏花如屋燕王宮  
下花成谷不須悔唱陽關曲直爲海棠也合來西蜀南柯子  
云恨望梅花驛凝情杜若洲香雲低處有高樓可惜高樓不  
近木蘭舟緘素雙魚遠題紅片策秋欲憑江水寄離愁江已  
東流那肯更西流又春若有情春莫去花如無恨花休落  
茶山詩十五卷九百一十篇者是也續刊後集亦十五卷然  
中間多泛應漫興者前輩所作猶自刪其半今人乃並存而  
不削欲其行世難矣

稼軒五言絕句元日云老病忘時節空齋曉尚眠兒童喚翁  
起今日是新年偶題云黃花眼倦開見酒手頻推不恨吾年  
老恨他將病來七言云錯處真成九州鐵落時能得幾鉤絲  
酒腸未減長鯨吸詩思如抽獨繭絲皆佳句然爲詞所掩

後村詩話續集卷四

後村詩話續集卷四

